

大正藏第 01 册 No. 0062

佛说新岁经 1 卷

No. 62 [No. 26(121), Nos. 61, 63 No. 99(1212), No. 100(228), No. 125(32.5)]

佛说新岁经

东晋天竺三藏昙无兰译

闻如是：

一时，佛在舍卫国祇树给孤独园，与大比丘众八万四千人俱。舍利弗、目连等，前后围遶，听佛说经。佛处大会，犹如须弥众山之王，独峻高显，如月盛满照于群星，威光唯景。如紫金耀于是场地，皆作金色，卓然特异，巍巍无侣。于时世尊，与比丘众俱，清净无量，如日如云，终究三月，以至新岁。诸比丘众寂然瞻怕，一心自思念于道定，无有异想。于是贤者阿难，即从座起，偏袒右臂，右膝着地，长跪叉手，前自归佛足，以偈叹曰：

「佛尊所以来， 游此以济护，
三月处于斯， 祇树孤独园。
所愿以具足， 今正是其时，
导师无等伦， 应宣布新岁。」

于时，世尊闻阿难说偈叹诵，至真寂坐一面，告贤者大目犍连：「汝往诣三千大千世界，幽闲山谷，峻顶石室，悉遍声告诸比丘众，始进旧学，逮诸未悟，悉使来会于斯祇树。所以者何？如来以到欲立新岁。」时大目犍连，踊在虚空，承佛圣旨，而发洪音，告于三千大千世界，其大响中自然演偈，而说颂曰：

「仁等所以处， 林藪山石间，
新岁时已到， 心所愿当成。」

时，诸比丘所在游居三千大千世界，闻斯偈告，各各以神足若干方便，变现其身，到祇树园，行诣佛所，受立新岁，并在佛边，合集弟子，各从异方他土来者，一时都会，凡八十万四千亿姪，欲受新岁。

彼时世尊，告贤者阿难：「汝往击于捷槌，时今已到。」阿难受教，即从座起，而挝捷槌，声遍佛土，一佛大国，地狱、饿鬼、畜生，闻捷槌音，承佛威神，一切诸病苦毒悉除，皆得安隐。

于时世尊，以净梵音，告诸比丘：「汝等宜起行舍罗筹，各各相对，悔过自责，相谢众失所犯非法，各忍和同，净身口心，令无余秽。」时诸比丘，即受佛教，各从坐起，在世尊前，各各相谢，忏悔所失讫，还复坐在其本位。

佛时见众各还位坐，佛垂慈愍，因从座起，而自叉手，向诸比丘言：「诸比丘众！当和心相向，向汝悔过。所以者何？我身口意，徬相违失，虽无上尊如来至真无有误差阙漏之业，心不放逸，不失智慧，无所贪慕，不毁禁戒，于诸声闻缘觉中，尊德超诸天世间人民，三界最长，而无等侣。又诸比丘！若种姓出家学道，修沙门法，心性各异，志操不同，在斯佛业，当可施行，宜奉训诲，不得违犯。所以者何？若有比丘，处于圣众，建立新岁，身行各异，心念不同，而怀谗谄；计彼比丘，不受真正，不应具戒。所以者何？身口意净，乃善真正。受佛具戒，心抱恭恪，顺上中下，不为慢恣，惭愧下意，乃应法戒。所以者何？如是行者，无有怨憎，不为结恨，观古今法，无有悞乱，建立新岁，亦无瞋恚自大之心。所以者何？戒禁清静，造立新岁，建立最大。戒不清净，非佛弟子，犹如死人尸形在地，弃捐冢间；天上世间，诸天人民，各赍良药，神呪好术，愍念疗之，不能使活。如是，比丘！毁犯禁戒，正使入众，若干新岁，不能自救，建成新岁。所以者何？是人毁戒，会归自然，因还获报，地狱、饿鬼、畜生苦毒，酸楚无量，汝勤慎之。」佛说是法已，即从座起，离于草蓐。寻时三千大千世界，六反震动，箜篌伎乐不鼓自鸣，天于虚空，雨众名香，而散杂花。佛说是戒法品时，告比丘众。时诸比丘，各在本坐，以佛圣旨威神之诲，功勋光明，皆以普周，各自起立，心不复乐，在于常坐山岩树下，唯是为欲。各从座起，稽首佛足，口自白言：「一切诸法，皆从佛受。圣则道本，为一切护，慈愍之目，最尊殊特，圣德无上，超绝无侣，巍巍堂堂，宣布道化。」

于时如来，迁延尊位，忏悔圣众，矜愍天下，还就草蓐。佛适复坐，圣众亦然，各就故位，复坐如法。

尔时世尊，见岁时到，愍念诸会，在比丘前，三自令竟。所立毕讫，五比丘从座起，建立新岁，适立新岁。一万比丘，得成道迹，八千比丘，得阿罗汉，虚空诸天八万四千，咸见开化，皆发无上正真道意，讲说经法。不可计数众生之类，建立三乘。今佛慈哀，枉屈至尊，处在众座，度脱危厄，十方蒙济。

于时难头和难龙王，各舍本居，皆持泽香栴檀杂香，往诣佛所，至新岁场，归命于佛及与圣众，稽首足下，以栴檀杂香，供养佛及比丘僧，便以斯偈，而欢颂曰：

「其在于山岩， 坐于阴树下，
若游于大海， 而怀饥瞋恨。
来坐立新岁， 亿载众生集，
供养悉奉佛， 得成甘露门。」

「于时海龙王，赍赤真珠，化作上妙交露阁帐，广长四百里，紫绀琉璃而共合成，手执擎持，行虚空中，出龙宫上，从交露阁，八味水池，流清洒地，供养如来及比丘众；以交露阁，贡上大圣及比丘僧；以珠璎珞，散佛圣众。即说偈言：

「清静如虚空， 等一自然无，
禁戒最清静， 踰珍妙明珠。
无央数众辈， 坐在于大会，
悉供养安住， 及诸声闻众。」

尔时十方诸菩萨、天龙神王，各从十方面而来合会，化作若干奇妙供具，供养世尊及比丘众，稽首归命，咨受经典，各复如是，等无有异，咸来稽首，皆发无上正真道意。于是天人，各各发心，供养世尊及诸圣众，以偈叹曰：

「其心以清静， 第一无思议，
圣众最尊长， 在于会中坐。
去离一切想， 善除众垢秽，
今日奉供养， 所敬不可议。
开化常众难， 一切诸尘劳，
其戒禁清静， 犹宝明月珠。
常心思惟正， 断众结瞋恨，

今日离垢尊， 合会立新岁。
悔心难调化， 遵行犹太山，
消碍常行法， 佛安立新岁。」

时诸天入，说是偈已，稽首佛足，忽然不现，各归本宫，而各欣悦以法自娱。

于时世尊，显大阴凉，众宝交露，以布圣众，便说此偈：

「其戒最清静， 所行甚难逮，
今日以乐施， 覆遍立新岁。
贡上安住子， 护戒甚清静，
如鹞爱其毛， 佛威护新岁。」

佛告诸比丘：「今佛世尊，虽新岁，一年一会，修行法则，清静道护，严身口意三事无秽，奉行十善、四等、六度，蠲除六情、三毒、五盖、十二牵连，净如日出照于天下，明晖照耀众冥消索入于道明，无上正真，一切和同，苦乐无二，乃应道法。」佛于是即说颂曰：

「诸佛兴出快， 说经法亦快，
圣众和同快， 和常得安乐。」

佛说如是。诸比丘众，诸天、龙、鬼神、阿须伦，世间人民，闻佛所说，莫不欢喜，作礼而去。

「最尊行为在舍卫， 为众弟子说如是，
一切为在祇树会， 今钵和兰造为常。
舍利弗叉手白佛， 愿闻等见钵和兰，
三界有名诚说时， 比丘自净法云何？」
「舍利弗罗我布草， 为于树下降魔力，
若曹布草亦如是， 今汝所生当自净。
如应贤者坐， 是为无所畏，
已坐乐无欲， 在三界安隐。
夏行今已竟， 为是佛弟子，
当各自分别， 愍伤在世间。
今是岁大月， 为觉第一智，

能自舍身行，见断若干苦。
为说诸罪恼，觉知无数苦，
是已得道迹，今为钵和兰。
贪欲瞋恚薄，亦能除本痴，
为能断生死，亦不恼想根。
自致得天上，亦来生人间，
是已得二道，今为钵和兰。
已致得天上，亦不得下生，
为在所生天，诸爱为已灭。
世间第一法，尊行为已得，
是已得二道，今为钵和兰。
一切诸恶恼，为尽得解脱，
已得四甘露，是为无所畏。
诸冥为已坏，所向一切苦，
是二四最道，今为钵和兰。

「一月已竟即得一智，二月已到便得二智，一时三月便得三智， 唵乐三智今为钵和兰， 已拔四疮无有余者， 已度岸住为得安隐， 已竟四月为无所者， 已成功德今为钵和兰。 能伏龙头难头和罗， 须弥山动亦并海水， 所致天处皆为其动， 目捷连辈今为钵和兰。」

「自觉最贤者，为诸处已尽，
为世间佑者，佛自说是语。
常独行树间，为譬喻如群，
为最辟支佛，今为钵和兰。
三处不复着，众为意清静，
三神为已定，为已离憍慢。
在三界无欲，亦不动静意，
安譬如须弥，今为钵和兰。
已行在右四，四道为已定，
佛说是贤者，最为众增德。
所祠施最安，终无有能败，
佛得众聚慧，今为钵和兰。
持戒为已具，众力不能动，
法食衣被服，常乐在山间。」

是为已坚行，具足无瑕秽，
清净行者地，今为钵和兰。
持戒断诸恶，众叉手受法，
为一切所向，众魔皆为伏。
诸天常善人，称誉戒具足，
不复覩众魔，今为钵和兰。」

佛说新岁经

【经文信息】大正藏第 01 册 No. 0062 新岁经

【版本记录】CBETA 电子佛典 Rev. 1.11 (Big5)，完成日期：2010/02/26

【编辑说明】本数据库由中华电子佛典协会（CBETA）依大正藏所编辑

【原始数据】萧镇国大德提供，张文明大德提供，北美某大德提供，法雨道场提供新式标点

【其他事项】本数据库可自由免费流通，详细内容请参阅【中华电子佛典协会数据库版权宣告】
